

MTV-Samichlauseide vom 30. November 2017

Hans Ruedi Schuppisser

Scho wider isch es Jahr verbii.
Mir isch, es seig erscht geschter gsii,
dass mir im Freie turnet händ.
Au s'Turnerjahr isch scho bald z' Änd.

Hütt isch drum Zyt, wie jedes Jahr,
für d' Chlausfiir vo der Turnerschaar.

(Bim MTV, für mich en Graus,
wirsch grad direkt zum Samichlaus.
Si händ mi no mal überschnorret.
Sälber gschuld, jetzt ghöreds d'Woret.)

De Blicki luegt unschuldig drii.
Er füert jetz s'erscht Mal da Regie
als Scheffchoch vo Frau Martis Gunscht!
De Bratwurstand isch süscht si Kunscht.

De Chris isch nonig „Sinterklaas“,
als „schwarze Piet“ hät er hüt Schpass.
Bim Turne und Trainiere - nöd eso.
Drum Chris, sötsch mee is Turne cho!

De Markus isch en Heimlifeiss.
En Tschuuter, wo vill Trickli weiss.
Er macht's als „Esel“ nöd so schlächt.
S'nächscht Mal bisch dänn de Chnecht Ruprächt.

De Sepp seit gärn, wo's dure gaat.
Bim Turne isch er gar nie z'schpaat.
Als Ehremitgliid turnet er no guet.
Gönd Bäll is Netz, verlüürt er nöd de Muet.

Als Ehremitgliid chunt der Ernscht vo wiit.
Zum Turne hät er fascht käi Ziit.
Zum mit öis fiire langts em aber scho.
Ganz prima Ernscht - und wiiter soo!

Der Albert schpillt nümme Volleyball.
S'Hundusfüere isch vil mee sin Fall.
Als Ehremitgliid tänkt er nöd, das wär's dänn gsii.
Öis freut's, bisch hütt am Samichlaus debii!
De Fredi, Präsident, scho zimli lang,
turnt wacker - ime tüüfe Gang.

Er läbt öis vor: 'Wer raschtet roschtet',
au wenn's eim Überwindig choschtet.

De Reto, füert s'Kässeli scho lang.
Zum Turne hätt er nöd so Drang.
Doch wänn's as Hallehockey gaat,
isch er zum Tschecke gärn parat.

De Seidel Chlaus turnt unverdrosse.
D' Aaläss hätt er immer gnosse.
Organisiert öis frisch und froh.
Prima Chlaus - mach wiiter so!

Em Turi Schteyer isch d'Gymnaschtik z'gschwind.
Diä Ulli- Musig seig doch nur für d'Chind
und gar nöd für so alti Veterane.
Hipp-Hopp?! Gaht's no?! Nun de Fahne!

Flott tuet de Meili Hans regiere.
Er cha das Veteraneschärli führe.
Wänn er - Punkt achti -füre schtaat,
dänn wüssed all, wos duregaat.

De Fritz chunnt usem Chelleland.
So wiit, per Töff, s'isch allerhand.
Er turnt natürli au no guet,
will's de Bodyform guet tuet.

Wilsch en Muschter-Turner gsee,
muesch de Eheim Werni nee.
Er chas am Reck und Barre no bringe,
wänn mir scho Müe händ mit em Schpringe!

Wär gaat zum Zürcher Turnverband
fürs Vaterland mit Herz und Hand?
De Trachsel Ruedi - nach Bruuch und Rächt.
Sehr guet Ruedi, das isch nöd schlächt!

Wänn de Bodo amigs iifrig wird
und de Ball grad übers Netz ie schmiert,
und erscht no cha en Punkt erhascha,
luegt er drii wie der Ali Pascha!

De Brunner Kurt isch en Alleskönner.
Chocht er, git's Fondü und kei Dönner.
Bim Turne mag er weidli schpringe.
Näbem Turne tuet er au no singe.

Als Fäschtwirt isch er ganz famos

im Gartehuus de Köbi Gross.
Tuet aber nümm gern weidli schpringe.
Devo chönnt d'Ulli Liedli singe!

De Schlegel Robert, früener Gooli,
schpilt bim Schpile gern de Tscholi.
De Ball mit Fuess und Chopf versänke:
De Gegner grinst und seit: Chasch tänke!

De Blättler Paul isch guet in Form,
passt au no ine Turnfäscht-Uniform.
Wo mir scho zimli lang müend uufgää
chan er no immer eine druuf gää.

De Fredi Zwei isch au so eine:
Bim Schpiil mit ihm, da chasch nöd geine
süschi isch de Punkt im voruus buechet.
Doch isch er keine, wo gern ruechet.

Isch de H.U. Gfeller daa, turnt er gärn.
Suscht reist er ume - nah und färn.
Öis Turner hät er Schpanie toll erschlosse.
Doch em Gmeindrat schtaat er gern uf d'Flosse.

Guet und fliisig turnt de von Rotz Bert.
Isch au immer dänn en sichere Wert,
wänn's um Fahrzüüg und um Werkzüüg gaat.
Und im Wirtshuus isch er gar nie z'schpaat.

Der Oski kommentiert de Schpiilverlauf,
isch aber gar kein Hau-ihm-drauf.
Bi eusem Turne und bim Volleyschpiil
häsch s'Gfühl, er seig vo Wart-e-Wiil.

De Edi turnt locker au mit öis.
D' Ulli-Musig isch für ihn nüüt Nöis.
Er isch halt zimli guet trainiert,
will ihn de Hund schpaziere füert.

De Flückiger Hans und de Meyer Guy
diä sind scho lang bim Turnverein debii.
Als alti Garde stönds em MTV guet aa.
Drum werdets vo mir hüt au in Rue glaa.

So - und jetzt säg ich, für hüt isch Schluss!
S'chönnt sii, min Esel wartet scho z'lang duss.

Drum säg ich allne, wo no fescht is Glas ie lueged:
Turned brav wiiter und merked, wänn's dänn gnueget!